



REPUBLIKA E KOSOVË

KUVENDI I KOMUNËS-VUSHTRRI

PROCESVERBAL
NGA MBLEDHJA SOLEMNE E KUVENDIT TË KOMUNËS SË VUSHTRRISË,
MBAJTUR MË 5 MARS 2024 PËR NDER TË EPOPESË SË UÇK-së

Mbledhja është mbajtur në sallën e Kuvendit të Komunës së Vushtrrisë duke filluar në orën 10:05.

Në këtë mbledhje ishin të pranishëm anëtarët e Kuvendit të Komunës së Vushtrrisë, Kryetari i komunës z.Ferit Idrizi, nënkryetari i komunës z.Shpëtim Zhegrova, drejtorët e drejtorive komunale, kryetari i Bashkësisë Islame në Vushtrri, zv. Komandanti i Policës në Vushtrri, përfaqësuesit e shoqatave të dala nga lufta e UÇK-së, anëtarë të familjeve të dëshmorëve, përfaqësues të subjekteve politike në Vushtrri, përfaqësuesit e KFOR-it dhe zyrtarë tjerë kompetent komunal.

Mbledhjen e hapi dhe e kryesoi Melihate Basholli-Latifi – kryesuese e kuvendit, e cila konstatoi se në sallë ka kuorum të mjaftueshëm për zhvillimin e mbledhjes.

Në fillim të mbledhjes u intonua himni kombëtar dhe ai shtetëror i Kosovës, në nderim të jetës dhe veprës së Komandantit Legjendar Adem Jashari, familjes së tij dhe Epopesë së UÇK-së.

Më pas kuvendi me një minutë heshtje nderoi jetën dhe veprën e Komandantit Legjendar Adem Jashari, familjes së tij dhe gjithë të rënëve për liri.

Melihate Basholli-Latifi – kryesuese e kuvendit- I nderuari Kryetar i komunës, z. Ferit Idrizi;
I nderuari nënkryetar i komunës, z. Shpëtim Zhegrova;
Të nderuar drejtorë të drejtorive;
Të nderuar anëtarë të kuvendit;
Të çmuar familjarë të dëshmorëve, të veteranëve, të invalidëve, të martirëve e të rënëve për liri;
Të nderuar përfaqësues të organizatave të dala nga Lufta e Ushtrisë Çlirimtare të Kosovës;
Të nderuar përfaqësues të partive politike;
Të nderuar përfaqësues të FSK-së, KFOR-it, të policisë së Kosovës;
Të nderuar përfaqësues të mediave, të shoqërisë civile dhe ju të pranishëm;
Zonja dhe zotërinj;
Shumë të nderuar qytetarë të Komunës së Vushtrrisë.

Jam jashtëzakonisht e nderuar dhe e privilegjuar që sot të shpall të hapur këtë seancë solemne kushtuar Epopesë së Ushtrisë Çlirimtare të Kosovës, rënies heroike të Komandantit Legjendar Adem Jashari, familjes Jashari, dëshmorëve, martirëve dhe të rënëve për liri. Në çdo përvjetor të datave 5, 6 e 7 mars, ne përkujtojmë sakrificën sublime, vetëflijuese e unike të familjes Jashari, kujtojmë e nderojmë luftën për çlirim dhe rënien heroike të kryekomandantit tonë legjendar Adem Jashari, përkujtojmë dëshmorët, martirët e të rënëve për liri. Kujtojmë e nderojmë luftën e shenjtë

të Ushtrisë Çlirimtare të Kosovës; kujtojmë e nderojmë veteranët e invalidët e luftës; kujtojmë e nderojmë të burgosurit politik; kujtojmë dhe nderojmë viktimat civile, sakrificën e popullit, sakrificën e secilit që punoi e kontribuoi për çlirimin dhe shtetndërtimin e vendit. Të nderuar të pranishëm, derisa sot kujtojmë se sa e gjatë, sa sfiduese e sa e mundimshme, por edhe me plot krenari, ka qenë rruga për çlirim, për liri e për pavarësi, duhet të mos harrojmë se ne duhet të jemi të bashkuar e të përkushtuar që të jetësojmë synimin e më të mirëve tanë ndër breza. Sa herë i kujtojmë ata, ne rivlerësojmë se sa e shenjtë e sa e rëndësishme është liria dhe bashkohemi më shumë se kurrë për realizimin e idealeve tona, gjegjësisht idealeve të dëshmorëve tanë. Derisa sot përkujtojmë këto data të rëndësishme të historisë sonë, fatkeqësisht në mesin tonë nuk gjenden çlirimtarët tanë të cilët padrejtësisht po gjykohen në Gjykatën e Hagës, për çka jemi të sigurt se do të dalin fitimtar edhe kësaj radhe. Qoftë i përjetshëm nderimi e kujtimi për Kryekomandantin Legjendar Adem Jashari dhe familjen e tij! Qoftë i përjetshëm nderimi e kujtimi për dëshmorët, martirët e të rënë për këtë vend brez pas brezi! Qofshim ne ata që realizojmë ëndrrën shekullore kombëtare! Ju faleminderit për vëmendje!

Ferit Idrizi, Kryetar i Komunës së Vushtrrisë—në fillim të diskutimit të tij përshëndeti gjithë të pranishmit:

Të nderuara familje të dëshmorëve;

Të nderuara familje të martirëve;

Të nderur ish të burgosur politik;

I nderuar kryetar i Shoqatës të Familjeve të Dëshmorëve të Ushtrisë Çlirimtare të Kosovës;

I nderua zv. Komandant i Stacionit Policor në Vushtrri;

I nderuar kryetar i Bashkësisë Islame në Vushtrri;

Të nderuar anëtarë të Kuvendit të Komunës së Vushtrrisë;

Të nderuar përfaqësues të subjekteve politike në Vushtrri;

I nderuar nënkryetar i komunës, kryesuese e kuvendit, drejtor të drejtorive komunale, gjithë ju të pranishëm;

Të dashur qytetarë të Komunës së Vushtrrisë.

Sot është një ditë e veçantë edhe për nga dimensionin historik, edhe për nga festa e madhe historike, por edhe për nga lavdia që nuk ka penë e as shkrim që mund t'i thurë lavditë dhe ta përshkruajë në detaje këtë ditë të madhe. Është epopeja e lavdishme e Ushtrisë Çlirimtare të Kosovës, është fillimi i një epoke të re, është fillimi i një dekade të re, është lufta çlirimtare e Komandantit Legjendar Adem Jashari dhe familjes së tij, është qëndresa heroike e familje Jashari, është lufta unike për liri dhe pavarësi kombëtare, është lufta e cila kulmoi me involvimin e faktorit ndërkombëtar, është lufta që bëri botën demokratike dhe faktorin ndërkombëtar, të kthejnë kokën kah shqiptarët e Kosovës që luftuan gjatë për liri dhe pavarësi që kur u nda Shqipëria në vitin 1913 dhe u futën forcat serbe në këto territore. Lufta jonë ka vazhduar përgjatë gjithë historisë me sakrificën më sublime në vitin 1918-1924, për të vazhduar në vitin 1945, sakrificat në demonstratat e vitit 1968, 1981, greva e minatorëve e vitit 1989, rezistenca paqësore e viteve 90 –ta, që kulmoi me daljen në skenë të Ushtrisë Çlirimtare të Kosovës me 28 nëntor 1997 dhe në fund sakrificat sublime e Komandantit Legjendar Adem Jashari dhe familjes së tij dhe deri në atë kohë faktori ndërkombëtar i shikonte karshi proceset që po zhvilloheshin në trojet shqiptare, veçanërisht në Kosovën e okupuar të gjakosur e të robëruar nga okupatori serb. Por Lufta e Ushtrisë Çlirimtare të Kosovës e Komandantit Legjendar Adem Jashari dhe familjes së tij i aktivizoi mekanizmat ndërkombëtarë dhe ishte vetë ambasadori amerikan ai i cili kishte dhënë një deklaratë ndryshe për Luftën e Ushtrisë Çlirimtare të Kosovës. Ishte i pari Robert Gelbard që i shprehu ngushëllime familjes Jashari dhe ishte diplomacia ndërkombëtare e cila iu kthye fuqishëm në mbështetje popullit

shqiptar në mbështetje të Luftës së Ushtrisë Çlirimtare të Kosovës dhe kjo shënnon kthesën nga një luftë guerile në një luftë frontale të përmasave kombëtare ku u thirr edhe mobilizimi i përgjithshëm. Ishte kjo koha më e lavdishme, por pa armatim të mjaftueshëm për të gjithë ata vullnetarë dhe vullnetare të cilët prisnin në rresht për të ngjitur Bjeshkëve të Nemura për ta kaluar kufirin Kosovë-Shqipëri, për të arritur deri në Tropojë për t'u armatosur dhe për t'ju bashkëngjitur luftës çlirimtare. Prandaj sot në këtë ditë të shenjtë në epopenë e luftës së lavdishme të Ushtrisë Çlirimtare të Kosovës dhe rënien heroike të Komandantit Legjendar Adem Jashari dhe familjes së tij, sot shënojmë epopenë e lavdishme të Ushtrisë Çlirimtare të Kosovës, sot flamujt valojnë lirshëm në tërë territorin e Republikës së Kosovës. Gjithçka që ndodhi gjatë historisë sonë kulmoi me lirinë dhe pavarësinë e Kosovës e cila për 100 vjet ishte e okupuar nga barbarët serbë. Andaj ne të gjallët jemi të privilegjuar, ne të gjallët jemi me fat që e pritëm këtë ditë dhe e festojmë këtë ditë në mënyrën më të mirë në vendin tonë në institucionet tona, të bashkuar i gjithë spektri politik i Kosovës, bashkë me shoqatat e dala nga lufta dhe me familjet e dëshmorëve, bashkë me veteranët dhe invalidët e UÇK-së, ata që i lanë gjymtyrët e tyre në betejat e luftës vetëm e vetëm për t'ia sjellë lirinë Kosovës.

Si kryetar i komunës së Vushtrrisë ndihet i privilegjuar të adresohet përfaqësuesve të zgjedhur të qytetarëve të Vushtrrisë dhe është nder që në mesin tonë kemi edhe dy bashkëluftëtarët e Komandantit Legjendar Adem Jashari z.Ali Januzi-Pasoma dhe z.Ramadan Manovi që kontribuan për lirinë e Kosovës.

Në fund ai apeloj për të gjithë që në ditë festive të këtyre datave të gjithë të jemi të bashkuar, sepse të gjithë jemi hisedar të këtyre festave, të bashkohemi rreth sakrificës së Komandantit të Ushtrisë Çlirimtare të Kosovës, sepse emblema e UÇK-së është vula e lirisë dhe pavarësisë së Kosovës. Lavdi e nderim jetës dhe veprës të Komandantit Legjendar Adem Jashari dhe familjes së tij dhe gjithë dëshmorëve të kombit respekt!

Ali Januzi, anëtar i kuvendit- në fillim të diskutimit të tij përshëndeti gjithë të pranishmit:

Të nderuara familje të dëshmorëve;

Të nderuara familje të martirëve;

Të nderur ish të burgosur politik;

I nderuar kryetar i Shoqatës të Familjeve të Dëshmorëve të Ushtrisë Çlirimtare të Kosovës;

I nderua zv. Komandant i Stacionit Policor në Vushtri;

I nderuar kryetar i Bashkësisë Islame në Vushtri;

Datat 5,6 dhe 7 mars 1998 kanë hyrë në analet e historisë më të re për Kosovën dhe shqiptaret anë e mbanë ka ata jetojnë. Këto data në kujtojnë dëshmoret të cilët iu kemi shumë borxh dhe asnjëherë nuk guxojmë ti harrojmë sepse këtë janë shtyllat e atdheut tonë, janë krenaria jonë. Kjo për faktin se ne që sot jemi të lirë jemi në saje të heroizmit të tyre. Në vazhdim citoj disa vargje të poetit tonë të mirënjohur Naim Frashri: <Shumë e bardhë kjo ditë për të gjithë shqiptaret, do të na sjell në dritë që s'kishin të parët> dhe shtoj se kush e solli këtë dritë vërtet gjaku i dëshmorëve. Në çdo përvjetor ne i kujtojmë me dhimbje por jemi edhe krenar me veprat e tyre të cilat do të mbesin të pavdekshme në faqen e historisë sonë të lavdishme. Në vazhden e diskutimit të tij ai evokoj disa kujtime me Komandanti Legjendar Adem Jashari, dhe familjaret e tij se si kishin bërë plane për organizmin e radhëve të UÇK-së dhe përballjen me armikun serb. Në fund ai tha se Adem Jashari dhe familja e tij janë madhështore do të mbesin të pavdekshëm në memorien kolektive të kombit tonë. Lavdi të gjithë dëshmorëve të kombit!

Gëzim Zuçaku, kryetar i Shoqatës të Familjeve të Dëshmorëve - në adresimin e tij para anëtarëve të kuvendit pasi përshëndeti gjithë të pranishmit, tha se sot, me krenari kujtojmë ditët e Epopesë së UÇK-së: 5, 6 dhe 7 marsin e 1998 – ë. Me krenari kujtojmë luftën e Komandantit

Legjendar Adem Jasharit. Me krenari kujtojmë sakrificën e madhe të Jasharëve legjendarë. Nuk ka përkufizim gjuhësor, historik dhe filozofik që kap përmasat e kësaj sakrifice. Kjo Epope mori përmasat e ngjarjeve të krijimit të botës së re në hapësirat gjeografike shqiptare, të ndërrimit të epokës së robërisë nga epoka e lirisë. Në ditët e Epopesë së UÇK-së u sprovuan vlerat më të larta të kombit: trimëria, besnikëria dhe shpirti heroik. Përmasa e flijimit historik mori dimensione legjendare. Ato ditë heroike nuk u bënë gërmadha kullat e Jasharëve, në të vërtetë, gërmadhë u bë sundimi serb në Kosovë. Gurët e kullave të Jasharëve u bënë gurë të piramidave kufitare të shtetit të Kosovës. Prandaj kjo sakrificë legjendare për liri u bë model unikat në historinë kombëtare dhe botërore. Njerëzit shpirtmëdhenj jo vetëm prekën historinë, por i dhanë trajtë asaj. Dhe çmimi ishte i lartë, por, faqja e historisë u bë shumë e ndritshme. Me luftën dhe rënien e tyre UÇK-ja u rrit në përmasa gjithëkombëtare, diplomacia botërore u vu në anën e luftës së drejtë të shqiptarëve. Me të drejtë, në analet e historisë moderne botërore, Ushtria Çlirimtare e Kosovës vlerësohet si projekti më i suksesshëm politiko-ushtarak. Vizioni politik i UÇK-së krijoi parakushtet për intervenimin e Aleancës më të fuqishme ushtarake në interes të vendit tonë. Në këto ditë të shënuara ndjejmë dhimbje të madhe sepse krerët e Ushtrisë Çlirimtare të Kosovës dhe komandantët e saj gjenden padrejtësisht në Tribunin e Hagës, sepse në këtë rast nuk akuzohet individ, por akuzohet lufta e Ushtrisë Çlirimtare të Kosovës. Në këto përmasa që po zhvillohet rendi i ri ndërkombëtar, besojmë dhe shpresojmë se do ta kuptojnë se Lufta e Ushtrisë Çlirimtare të Kosovës ishte e drejtë dhe e saktë dhe se ne nuk ishim agresorë, por ishim viktimë, ne shpresojmë që krerët e UÇK-së shumë shpejt të lirohen dhe të kthehen fitimtar në Kosovë. Lavdi Komandantit Legjendar Adem Jashari, lavdi gjithë Dëshmorëve të kombit, nder dhe respekt për gjithë invalidët dhe veteranët e UÇK-së, urime Epoja e UÇK-së, Zoti e Bekoftë Republikën e Kosovës dhe popullin e saj.

Adnan Lahu, anëtar i kuvendit- në adresimin e tij para kuvendit si përfaqësues i LDK-së pasi i përshëndeti të pranishmit deklaroj:

Epopeja e Ushtrisë Çlirimtare të Kosovës ishte një rrëfim i lavdishëm i luftës për liri dhe pavarësi të popullit të Kosovës kundër regjimit serb. Pjesëtarët e UÇK-së, përmes guximit dhe vendosmërisë së tyre, luftuan për të mbrojtur të drejtat dhe identitetin kombëtar të shqiptarëve të Kosovës. Përkushtimi i tyre për liri dhe pavarësi bëri të mundur arritjen e qëllimit të tyre, duke e bërë Kosovën shtet të pavarur dhe sovran. Kjo epope e heroizmit dhe sakrificës është një pjesë thelbësore e identitetit kombëtar të Kosovës. Adem Jashari është simbol i rezistencës dhe heroizmit në Kosovë. Ai ishte një figurë kyçe në Ushtrinë Çlirimtare të Kosovës dhe luajti një rol të rëndësishëm në luftën për pavarësinë e Kosovës nga Serbia. Trashëgimia e Jasharit vazhdon të frymëzojë në Kosovë dhe përtej saj. Jashari si udhëheqës i Ushtrisë Çlirimtare të Kosovës dhe Ibrahim Rugova si lider i parë politikë i Kosovës pas ndarjes së Jugosllavisë i cili përfaqësoj frymën e pacifizmit dhe diplomacisë në luftën për pavarësi dhe liri të Kosovës, kombinimi i vizionit politik dhe guximit ushtarak të Rugovës dhe Jasharit në thelb ndikoi në rrugën drejt pavarësisë së Kosovës. Trashëgimia e tyre përjeton në të gjithë historinë e Kosovës, duke frymëzuar gjenerata të reja drejt qëllimit të përbashkët: lirisë dhe përparimit të vendit tonë.

Lavdi të përjetshme të gjithë atyre që dhanë jetën për lirinë e Kosovës.

Sylejman Mehulli, anëtar i kuvendit- në adresimin e tij para kuvendit si përfaqësues i LVV-së pasi i përshëndeti të pranishmit deklaroj: 5,6 dhe 7 marsi i vitit 1998 janë data vërtet historike të shkruar me shkronja të arta në analet e historisë që e ndryshuan këtë të fundi për 100 vjet. Nga padrejtësitë e Berlinit deri tek ato të Londrës, ishin Jasharajt që me sakrificën e tyre sublime që bënë, e bërën kthesën e përmirësimit të gabimeve dhe padrejtësive historike që fuqitë e mëdha i bënë ndaj Kombit dhe Çështjes Shqiptare. Në një kohë kur regjimi po i shtrëngonte masat separatiste dhe fashiste ndaj popullit tonë, ishin pikërisht Jasharët që me guximin e tyre i dolën për

ballë një shteti fashistë që kishte nivel federativ me një fuqi në raport me ne ishte gjigande, mirëpo që e drejta, guximi, heroizmi dhe sakrifica e popullit shqiptarë që më mirë se askush përfaqësohej nga Jasharajt ishin pikërisht që u vendosën përball këtij regjimi. Më tej ai edhe pse i ri në moshë në kohë lufte, evokoj me krenari kujtime nga ajo periudhë në ngritjen e celulave të para në zonën e Shalës, përkatësisht në fshatin e tij të lindjen në Akrshticë prej nga vjen edhe Komandanti Rahman Rama, ku nga dëshmoret e para janë bija të këtij fshati njëherazi bashkëshorte të Adem, dhe Hamëz Jashari. Por në këtë kohë aparati shtetëror serb kishte filluar presonin publik mbi banoret lokal të kësaj zone mbi Vushtrriasit, sepse ata e dini mirë trekëndëshin e bashkëpunimit që kishin, deri tek aksioni i parë kur Jasharajt në bashkëpunim me Gjeneral Rahman Rama çarmatosen një konvoj të ushtrisë serbe, aty ishte fundi që patrullat e policisë serbe shkelnin në fshatin Akrshticë, pra ishte fundi, sepse edhe aparati shtetëror serb kishte deklaruar se atje duhet shkuar me ushtri dhe tanke. Por kësajsoj flijimi i jasharëve në Prkazë kishte rritur guximin qytetar dhe kishte ndikuar në shtrirjen dhe rritjen e radhëve të UÇK-së dhe organizimin e zonave operative të luftës. Kjo kishte bërë të kemi një mobilizim të pashembullt të popullit dhe duke ndikuar edhe në sensibilizimin e faktorit ndërkombëtar që çështja e Kosovës duhet zgjidhur. Prandaj jemi fjalë pak dhe fjalë mangët për të përshkruar kontributin e jashtëzakonshëm të familjes Jashari, kontributin e dëshmorëve të kombit, gjaku i tyre nuk do të tretet kurrë. Aparati jugosllav, ishte aq i pa mëshirshëm sa që nuk kurseu as fëmijë, as gra dhe pleq, nuk kurseu as mësuesin në shkollë, as bujkun në arë, mirëpo ne ishim në të drejtën tonë dhe dolëm fitimtar. Adem Jashari, familja e tij dhe gjithë dëshmorët për lirë, janë të vetmit që e kanë kryer borxhin ndaj atdheut. Në e që jemi gjallë duhet të punojmë shumë për ta jetësuar amanetin që kemi ndaj dëshmorëve. Familja Jashari dhe dëshmoret do të jenë model për fëmijët tani se si duhet të luftohet dhe mbrohet atdheu, ata do të jenë frymëzim për fëmijët dhe gjeneratat që do të vine. Lavdi Ushtrisë Çlirimtare të Kosovës, lavdi Familjes Jashari dhe gjithë dëshmorëve të kombit, nder dhe respekt për të gjithë ata që sakrifkuan ndër breza për lirinë dhe çështjen kombëtare.

Mbledhja përfundoi në ora: 10:35

Bastri Duraku



Procesmbajtës

Melihate Basholli-Latifi



Kryesuese e Kuvendit

